

Ե անցնում, նստած գեղեցիկ նժոյգի վրայ, ինքը փայլում է ոսկու մեջ, ծին արծաթապատ ասպազենքով, զենքերը վառում են թանկագին ակներով, ամեն կողմից մատով ցոյց են տալիս նրան, ընկերն ընկերին ասում է. «տե՛ս ի՛նչ քաջ երիտասարդ է»... Բայց ո՞ր կռոի մեջն է մտել այդ կնամարդը, վերք տոել ու վերք ստացել, այդ ոչ ոք չէ հարցնում: Առաջ մի երիտասարդ մինչեւ մի քանի տասնեակ մարդիկ սպանած չլինեք, մինչեւ իր մարմնի վրայ մի քանի վերքեր ստացած չլինեք, նրան աղջիկ չէին տալ. եւ մեր աղջիկները անպատուութիւն կը համարէին երկչոտին ու անարիին իրանց փեսայ ընտրել: Հիմա դրանց նայող չկայ. հիմա երիտասարդի քսակն են շօշափում, որ տեսնեն՝ քանի դուրուշ ունի: Ճշմարիտ քաջութիւնը կորել է, եւ նրան փոխարինել է օսմանցու թուլամորթութիւնը: Այժմ առաջուայ քուրդը չէ մնացել, եւ եթէ մարդիկ կան, այն եւս կարելի է գտնել հին սերունդի մեջ, նորը բոլորովին փչացած է: Մեր վաղեմի երիտասարդները իրանց մարմնի վրայ կրած սպիւնները իրանց զարդն էին համարում եւ այդ նշաններով պարծենում էին: Բայց այժմեանները հոգի են տալիս օսմանլոի շքանշանի համար, եւ գժոածի նման վազ են տալիս պաշտօնների ու աստիճանների ետեւից: Եւ օսմանցիք, օգուտ քաղելով մեր փառասերների այդ մոլորութիւններից, վատերին առաջ են քաշում, իսկ լաւերին ետ են մղում...

Ոստանի աւերակների վրայ, ծերունի քրդի բերանով խօսում էր նահապետական ժողովրդի խաբոած ոգին: Մէկի ներկայացուցիչը բողոքում էր, միւսի ներկայացուցիչը՝ Ասլանը, լռութեամբ լսում էր...

Վերջինը հեգնութեամբ հարցրեց.

— Լաւ է, որ դու չիրապուրոեցար օսմանլոի փայլուն շքանշաններով:

— Ես աւելի պատուաւոր համարեցի այսպէս աղքատ, այսպէս չքաւոր ապրել այն գետնափոր խրճիթի մեջ, իմ քաջ նախահարց շիրիմների մօտ, քան թէ իմ կուրծքը զարդարել օսմանլոի շքանշանով, որ ստանում են շողոթորթները, կեղծաւորները, խաբեբաները միայն, վաճառելով իրանց խիղճն ու պատիւը: Ես այժմ ունեմ հինգ այծ եւ դրանով բախտաւոր եմ: Այդ հինգ այծը փոխարինում է այն հարիւրաւոր անասուններին, որ խլեց ինձանից օսմանցին: Այդ բոլորից յետոյ՝ գնալ եւ օսմանլոի ոտները լիզե՞լ, քաւ՝ լիցի, քաղցածութիւնից կը մեռնի ծերունի Օմար-աղան եւ իրան չի ստորացնի...

Նա կրկին անգամ շնորհակալութիւն յայտնեց ստացած ծխախոտի համար, վերկացաւ եւ, իր երկու ցուպերի վրայ կաղալով, սկսեց ընթանալ դէպի իր խրճիթը: